

## Duas medaglias per Jon-Fadri Nufer als campjunadis svizzers

Il Tuatschin *Jon-Fadri Nufer* ha contonschiu duas ga il podest als campjunadis svizzers da cuorsa liunga la fin dall'jamna vargada a Zweisimmen-Sparenmoos. El skiatlon sur la distanza da duas ga 7,5 km ha el pudiu setener bein all'entschatta dalla cuorsa ella grupp alla testa. La midada dil classic sil skating ei reussida bein ad el. La fin finala ha el contonschiu igl excellent tierz rang ella categoria dils umens sut 18 onns. Il skiatlon ei vegnius arranschaus enstagl dil sprint. Jon-Fadri Nufer ha nezegiau las davosas jamnas mintgamai la sera suenter la lavur per sepreparar per quel, surtut la midada dils skis e dil ritmus. Aschia ein sias stentas supplementaras sepagadas. Secund ei il giuven Tuatschin daventaus ella cuorsa da distanza liunga sur 20 km. Naven dall'entschatta eis el staus alla testa e ha la fin finala stuii suttacumber el sprint sulet agl Engiadines *Isai Neff*.

### Argien per Toni Livers

El skiatlon dall'elita ch'ei vegnius gudignaus da *Dario Cologna* ei *Cla-Ursin Nufer* dil Club da skis Sedrun-Tujetsch daventaus bien 13avel. Ella cuorsa da 50 km ha el contonschiu il 16avel rang. Era quella ei vegnida gudignada da Dario Cologna avon *Toni Livers*, oriunds da Trun, che ha mussau in'excellenta prestaziun. La fin finala ha el stuii suttacumber mo per pauc a Cologna. 15avel ei *Eligius Tambornino* dil Club da skis Trun daventaus e sco 24avel ei *Kevin Camathias* da Sagogn seplazzaus.

### Buna finiziun dalla stagiun

Per la fin dalla stagiun han era ils commembers pli giuvens dil cader nordic dil SST contonschiu plirs buns resultats. Als Dis da cuorsa liunga dils scolars da Cuera a Lantsch ha *Heikki Piali* dall'OG Trin gudignau ella categoria dils mattatschs sut 14 onns. Allas concorrenzas dil «Trophy Games XCX» dil Helvetia Nordic, medemamein a Lantsch, ha *Tylan Michel* dall'OG Trin contonschiu il tierz rang tiels mattatschs sut 14 onns e Heikki Piali il novavel. *Maurin Schmed* dil Selvaclub Sagogn ei daventaus 44avel ed ella categoria sut 16 onns ei *Luca Deplazes* dil Club da skis Trun currius sil 37avel rang. Al final dalla Helvetia Trophy ei Maurin Schmed daventaus 14avel ella categoria sut 13 onns, Tylan Michel quart ella categoria sut 14 onns e Heikki Piali 13avel. Luca Deplazes ha contonschiu il 22avel rang ella categoria U16. (fmr/hh)